




673



權載之文集

四



Inches 1 2 3 4 5 6 7 8


Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

TIFFEN Color Control Patches

© The Tiffen Company, 2007





權載之女集卷第十九

唐權德輿字載之

行狀

故司徒兼侍中上柱國北平郡王贈太傅馬公

行狀

曾祖君才皇右武侯大將軍南陽郡公降洛州治中

祖珉皇右鈐衛倉曹參軍累贈尚書右僕射

父季龍皇大同軍使嵐州刺史幽州經畧副

使累贈司空

汝州郟城縣臨汝鄉石臺里馬燧字珣

唐書作洵

美年七十

太傅英朗特達剛方中正體苞五常致其用以贊皇極國有二柄壯其猷以合神武終始盛烈爲唐宗公原夫代有勲德延耀儲祉王佐之業至公而光年十四從師講學因輟卷喟然曰大丈夫當建功立名以康濟天下豈能矻矻爲章句儒耶讀左氏春秋孫吳兵法與歷代君臣大本成敗大較忠賢功用奇正方畧會其歸趣如指諸掌十九丁內艱泣血三年以孝聞天寶末安祿山擁幽陵之師南向以光祿卿賈循爲留後公以畫千循

勸誅逆將向潤客牛庭珣等然後傳檄仗順可覆而取之循疑留不決竟及於禍踰月間行至于常山時河朔擾攘物情恟懼公方以褒衣居裾游談感激因其謀而扶義建節者衆矣寶應中陳鄭節度李涼公抱玉移鎮上黨雅知公才表爲晉州趙城尉時王師旣破史朝義乃復河洛有迴鶻可汗之助因肆暴而歸以功自負其強難屈節將使上介致餼皆懼不敢行公官方解巾急病不讓徑詰其壘申明要約氣盛詞直虜皆擾從可汗乃授以旗幟委之供辨且曰有犯禁者公其董之於是蕃部肅然莫不畏服後有酋長求賂於公者立斬十餘

人可汗大駭疾馳出境安人禁暴之畧兆於斯矣河北副元帥僕固懷恩居將相之重恃父子之勇可汗又其子婿也藉以爲援將有異圖公密覘其情請爲之備初僞范陽節度李懷仙與相衛恒定等四帥相繼來降懷恩結爲黨助奏復其職至是擁衆據汾上子瑒圍太原相魏餽餽以相犄角公至安陽說其帥曰懷恩惜刻以逞欲其子輕佻而好勝人人自爲計坐待帳下之變耳深陳利害勸諭激切由是感公言至涕泣改圖因約懷仙等三人奉章獻欵旣迴鶻北歸懷恩與瑒繼死公之明識遠畧皆此類也本使尋奏改左武衛兵曹參軍歷

太子通事舍人著作郎以至秘書少監兼殿中侍御史轉營田節度二判官永泰中拜鄭州刺史兼侍御史至是頒六條撫四封分憂於上施惠於下時兵食方調杼軸其空公乃闢其田畝均其戶版每歲一稅百姓便之生齒益息庶物蕃阜大厯中改懷州刺史其夏大旱公以救災沴莫若修教化掩幣埋芻蠲苛息隱使皆得其欲而無窮人端居潔誠默以心禱至七月穰穀滿野墉亡者襁負而至朝廷以汧陽被邊宜得文武之守拜隴州刺史兼御史中丞公乃訓州師修器備郡城之西有路與蕃境相直凡二百餘步上連峻峰公乃躬自行視

塞其蹊隧功堅力省疆場以寧又置譙門於阨狹之地
中制扇鏑上施干櫓積戢之患旬日而安連帥憚公威
望日盛羈留幕府因以受代家居京師者久之先皇帝
召見奇其才受商州刺史兼御史中丞未旬日屬河陽
三城逐其師擇可以撫宣之者特拜左散騎常侍兼御
史大夫充河陽三城使是歲大曆十年也夏五月汴宋
兵馬使李靈耀以濮陽叛俄據浚郊國家始務靖人特
屈常憲因以節度留後授之而又結魏師以略東郡不
利六月詔公與淮西節度使李忠臣夾攻之時寇鋒寔盛
忠臣每合皆北將棄師以免者數矣公嘗激以壯志或

給之吉夢忠臣旣慙且憤引師復還先是忠臣軍汴南
公軍汴北每與虜虜所向無前初敗之於滎澤又破之
於西梁固至是靈耀以其勇悍者八千人號爲俄狼營
盡銳來拒公引戲下決戰遂勝入郟時魏之救兵二萬
距大梁三十里所公又合諸侯之師用奇設伏以敢死
士三千人鼓譟先登大敗之魏將軍單騎遁去靈耀以
其徒宵潰翌日餘黨以城內八千人降於公公悉讓忠
臣推而不處閉壘移疾退於坂橋其士吏鹵獲悉以家
財購而復之大梁之人至今知感履險則忠以盡敵成
功則讓以保身此又將帥之明哲也十二年三月詔復

魏博之地諸侯班師公乃歸鎮河陽秋雨暴至河流決
溢軍吏等具楫權請公登舟以避公曰城中凡數十萬
口吾實主之而苟以一家求安所不忍爲也旣而人皆
感泣水不爲患十四年閏五月皇帝卽位深燭理本以
太原王業所起國之北門非勳德爛然者不能鎮定特
拜工部尙書兼御史大夫太原尹北都留守充河東節
度觀察等使於是修班制正事典險其走集訓其輿師
講車徒戰陣之法教金鼓聲氣之節分畫之下變化如
神自是烽候罷警匈奴不敢南向而牧矣建中二年夏
六月來朝京師加兵部尙書封幽國公初魏博席伯父

之勢而得專地旣踰年與東平常山復爲從約七月魏

以兵三萬圍

一作圖

邢州攻臨洛昭義節度使上請公爲

援朝廷許之十月公會昭義之師與神策行營兵馬使
故大尉西平王於漳州先是魏以浚郊之敗誓公威望
至是以節制師專征伐之任兵刃完利部校訓齊軍聲
大振士氣益勵魏人又分銳騎合恒定李惟岳之衆萬
餘於臨洛南雙崗下樹柵以自固公自晨至晦急擊大
潰殺其將楊朝光時臨洛之圍場壘四匝復與昭義鼓
行軍前腹背受敵颺塵翳景士皆決死凡百餘合公自
據西壕口扼其喉以襲破之兇徒斃踣亂相蹂躪收其

車重兵械各數十萬魏人委營而遁邢圍迎潰上嘉其功拜尚書右僕射先是公與軍吏約曰苟戮力成功者當竭產以賞至是悉索家錢與庫服臧獲等莫其價之上下視其功之薄厚散於軍中約五十萬且曰苟可以夷患難勉師人赤誠之外無非長物故盡其私積賈其餘勇士皆歛歔感勵爭以効命報焉優詔褒異命史臣書之且詔有司以量入之賦如其數以復於公其毀家佐軍輕賞厚下皆此類也三年正月魏人又乞師於東平常山衆且四方壁於洹水公曰不備不虞不可以師且以河陽三城常所訓定上請爲助有詔從之乃建三

橋夾河爲壘乘變出奇如環無端初則銜枚以趨敵因乘其未備後則薙草以滅火使計不得用然後分銳士颺馳以犯之而後從之獲首級者殆半餘皆走林溺水僵尸相屬腥穢川陸公愀然曰是皆平原人也彼暴服之耳亦旣就斃忍其委骨肉如是耶使得以族屬收瘞旣而生者知感由是洛博二州僞署刺史各以其地來降鄴魏之間以咫尺之書招下二十餘城朱滔誘其隣帥復來助寇四月公有魏成之捷五月詔同中書門下平章事仍封北平郡王時諸軍連捷師留且久或已一作有復其侵地則怠於攻取公具以上聞有詔朔方節度

李懷光應援征討六月朱滔以漁陽之甲三萬至于城下初諸侯有議班師者公曰彼三戰三北假息孤城且宿兵十萬聞援強而退縱敵生患何以復命於明庭耶旣而羣帥相勵皆百其勇七月加魏州大都督府長史仍充魏博瀘相四州節度招討等使四年二月又敗之於成安魏軍退於館陶深壁以自固冬十月盜臣竊發鑾輅狩于近郊公忠憤逾迫密圖方畧懷光統朔方之旅乘歸心以赴難公齧臂伏泣以大節感動之時朱滔招連北虜邊鄙日聳公謂諸將曰夙駕整旅以扈屬車人臣之分也儻北都不守卽兩河三川搖矣豈行師扞

患之義耶乃還太原遣行軍司馬王權統銳騎五千與監軍使者赴行在又令男彙與大將等男各一人赴焉軍實祿賜器備服用一以條奏獻於行宮公初旋師也以晉陽大鹵用武之地北蕃東夏且有外虞而都城之東平坦受敵乃股引汾晉二川漲爲平湖能順地泐以導水勢守陴者歲減其役濱河者日厚其生而又廣堤濬池密樹如織金湯自固版幹不動其明智善利之及人也如此公自出車累歲功捷相繼而軍中衣食多出寇境河東之人省調給饋餼之勞歲減其賦封內相賀因中貴人以聞願刻金石詔從其請公避名不伐懇疏

方止勞謙之詞邦人誦之此所謂尊而光晦而彰也公常揣摹諸侯開導功善能通其變以誘其衷盡益友之直諒啟純臣之志畧因所以建大順立大勳者有焉興元元年二月李懷光貪天犯上衝連逆泚脇其人以河中叛公威聲素振壤地相接支郡屬城降者繼至秋七月皇帝旣平大盜乃清宮廟加河東保寧奉誠等行軍營副元帥有詔許公與諸軍圍討河中九月旣望師及於絳僞刺史王克同棄城而遁餘黨來降分狗下縣進軍寶鼎斬其將條伯文先是懷光之師勇於豨突至是獲甲首千數兇徒奪氣矣貞元元年六月公以軍國大

要非章表所盡釋位來朝親稟睿畧乃屈指成算請三旬芻粟以平之秋七月與河中節度使今侍中咸寧王及同華邠寧之師次于長春宮公以單騎傳于城下召大將徐庭光西向受命且以君恩喻之曰兵興已來逾三十年而朔方之師最爲忠力今乘時自効若建瓴水豈甘心嗇禍終于鋒刃耶開陳逆順聲涕交感又曰跬步之內矢石所及若決爲匪人亦在今日因披襟直前當之庭光頰伏拜泣莫敢仰視抗詞未畢堅壁洞開公徑入撫定奉宣皇澤於是城中周呼曰吾等復爲王人矣八月公與咸寧合軍而東至于焦離堡降其將尉

珪乃次河中陣于城下懷光傳首其衆請命是舉也不勞師獻功如其素焉就加侍中歸鎮北都三年二月來朝京師寇戎旣清乞罷藩鎮六月拜司徒兼侍中詔有司具儀法冊命禮賜備厚昭德報功人臣榮之屯師河中也靈武節度杜希全獻體要八事上因著君臣箴以賜之公奉表陳賀上又賜公宸展台衡銘各一首公令男暢詣闕謝恩並請揭而書之於起義堂之側詔下優答其畧曰卿有訏謨濟代之誠保衡輔朕之志情之所尚遂飾以詞比夫盤盂自銘亦冀輔佐同德遂刻石兼賜題額寵渥之盛冠耀當時五年九月嘗與故太尉西

平王同對於別殿上曰卿二人與朕休戚是同各賜圖形麟閣并製文命皇太子書於閣壁至於君使臣臣事君選賢與能之盛盡忠作憲之績煥乎天文與日月並命矣九年十月公以足疾久缺朝請因至中書奉表起居召對拜舞手悞至地上驚遽自起以接之公慙惶踞踣感甚以泣上曰元首股肱本爲同體卿之疾痛何異朕身爲遣中使梁懷幹扶掖下殿十三年二月以年及懸車再表讓侍中優詔崇獎終不得請八月十七日薨於安邑里私第皇帝震悼不視朝四日先是詔宰相詣宅問疾御醫禁方旁午於途疾劇遺表指陳邊事純誠

在公言不及私薨之明日詔贈太傅又詔文武百寮就
宅弔哭京兆尹護喪萬年今爲副司農卿嗣吳王熾充
弔使鴻臚少卿王權爲副購贈絹二千疋布五百端米
粟二千石二十七日命太常卿裴郁副使少府少監路
恕備禮持節冊命上所以待大臣之禮備矣惟公始以
文理參佐至于牧守將帥功業見乎變德刑焯於時所
以順天明從君命布皇澤宣國威能竭忠力而爲藩衛
理軍如家馭下以誠拊循厚而士勵法禁明而衆整誓
師鞠旅皆樂爲用料敵制勝如在彀中此戰之所由克
也凡再分兵符而三破劇賊開相府十四年以上公居

中者九年至於盡沃心之言當注意之重密啟詭詞人
莫得而知之昔舜之官人也高作司徒龍伯納言惟公
居之周之命將也方叔元老申伯于蕃惟公嗣之加以
馮異之推功趙奢之享士子囊之城郢文子之不屬其
子惟公備之故歲時爲饗追享盛公侯之禮會朝鳴玉
拜後聯卿士之榮公之展孝也公之敬忠也凡自府辟
多爲國華登中朝以潤王度分外闡而貞師律公之知
人也公之舉善也洪範之文用三德濶用五福惜公不
踰期頤其他則無不及也德輿自左補闕三歲而爲右
史掖垣之屬備承功烈褒贈之禮獲奉命書今先遠有

期祖載將及易其名者改告有司謹狀貞元十一年十月十六日宣德郎守起居舍人知制誥雲騎尉權德輿上尚書考功夫建侯行師先王之所以懲不恪也考行尊名先王之所以勸人臣也謹按故司徒兼侍中上柱國北平郡王贈太傅馬公勤勞王家功德茂盛其謀猷合於君其忠利加於人用登公相以殿邦國今體魄則降日月有時敢錄寬行請徵諡法謹上

權載之文集卷第十九

權載之文集卷第二十

唐權德輿字載之

行狀

故朝議郎守太子賓客上輕車都尉賜紫金魚袋贈太子太傅盧公行狀

曾祖勤嘉皇朝散大夫青州司馬隴城縣開

國子

祖克明皇瀛州高陽縣令贈國子祭酒

父沼皇陝州芮城縣尉累贈慈州刺史秘書

監

河南府洛陽縣遵化鄉恭安里盧邁字子

元年六十

狀公以仁爲經以義爲用宗四教之根本探六籍之菁華其門風士行天下歸重以居室之和移諸官署以率性之道宏于事業自解中試吏至佩相印不爲利疚不爲物遷令名豐祿與之終始推是道也年未志學累丁齊斬純孝孺慕外除猶毀博買儒書不耀其華特爲叔舅太傅文貞公之所賞鑒經明筮仕補太子正字藍田尉會府試言拔乎其萃轉河南主簿尋有詔充集賢校理建中初上方靖端百度修起五諫拜右補闕俄換侍

御史興元元年遷刑部員外郎間一日又以本官兼侍御史介相國蕭公宣慰于江淮奉憂勤之旨宣愷悌之澤四牡所及熙熙如春旣復命轉吏部員外郎每歲赴調者雜而多端廢置關決在於郎吏情僞之所伏姦吏之所因攻堅本導天察從容折中而優爲之又以京師食貧諸孤衣食爲念求出爲滁州刺史仁惻之政人到于今懷之朝廷嘉其理行徵入爲司門郎中自時厥後比歲超拜歷諫議大夫左曹右轄乃參大政皆用德進人無異詞間一歲遷中書侍郎平章事又一歲感風痺寢疾周月除太子賓客貞元十四年六月某日薨于家

追命太子太傅公寬舒宏重有姿度風表而憲章品式
政事成法經通縝密靡不周貫居諫諍之官言必削藁
自非成命頒行而人莫知者又常以考課之法溢美相
蒙革其已然當自二府時居左垣固辭上第宰政歎其
能讓因以從之庶官之濫者知懼而百職循矣燮和台
階秉直閑邪率循中庸左右皇極德輝陶然不見其際
詩曰衣錦褰衣裳錦褰裳惡其文之著也公誠有之不
然豈移疾家居者旬歲上章乞告者七反然後得請至
於飾終追錫有加禮焉此固有以異于常而得之也早
歲以游寓于南譙與崔文貞公講學至穀梁傳因附經

義有以規者文貞慙歎爲之著重請銘且曰吾以爾爲
甥亦以爾爲友知免於大過矣其推重如此天性篤於
慈仁厚於情禮每居功總之喪其於言而不議議而不
及樂率皆容稱其服而有加焉故事宰臣非上公承攝
之禮圖丘齋祠之敬則未嘗以騶騎導出國門者公從
父弟歿於蜀都轎車之來道秦赴洛出東門十數里以
展哀送度越常檢名教多之其居部也叔父下邳令休
沐至止朋來憧憧侍食佐酒彌日通夕與羣從之少者
冠者均其指使章紱之外無以異焉再娶無子或以嗣
不可絕論之他求者則曰吾舅文貞常言之矣兄弟之

子猶子也引而進之可以主後故自成年至于捐館其所以留于聰明接于心術者中正之外無自入焉應官俸賜必振六姻之乏卽遠裳帷唯資四布之購季文之廉忠張仲之孝友魏舒之宏粹孔光之慎密兼而具之日月有時盡徵謚法是用傳信移諸有司謹狀

貞元十四年九月十二日故吏議郎守尚書司勳郎中知制誥雲騎尉賜緋魚袋權德輿謹上尚書考功禮有易名本於周道必視其行勸孰甚焉謹按故朝議大夫守太子賓客贈太子太傅盧公德範顯印如大圭鑿器闔門風訓儀表人倫乃持國均以鎮雅俗絜矩居易有

初有終瞻彼九原旣徵先遠之卜節其一惠敢忘至公之議謹上

唐故大中大夫守國子祭酒潁川縣開國男賜

紫金魚袋贈戶部尚書韓公行狀

曾祖符皇潭陽郡太守

祖大智皇河南府士曹參軍贈吏部郎中

父休皇太子少保贈司空諡文忠公

京兆府萬年縣芙蓉鄉龍游里韓河年六

十三

狀公字幼深其先潁川人自同姓於周受封於韓逮獻

子而爲正卿至景侯而開列國司馬氏代家言之詳矣
八代祖播徙居潁川遂爲潁川人繼有勳力代名忠孝
以至文忠公用醇仁清德左右无宗致中和以爲國經
躬愷悌以爲家法公纂承茂緒幼有令聞直方簡重博
厚宏大該涉羣書尤治春秋詩禮之學必睹其奧而踐
乎中未弱冠以門廕補宏文生滿歲參調侍郎達奚珣
矯枉過正以地望降資署章懷太子陵令且將察其詞
氣以爲銓藻公恬然受署初無愠容當時識者知其致
遠天寶末盜陷兩京兄侄七人遭離不淑茹痛違難寓
于江南布衣蔬食不聽聲樂者積六七歲友悌行義士

林以爲難翹車書辟旁午而至累授漢中郡江陵府二
功曹大理司直兼漢中郡司馬蘇州司馬且皆有賓介
之請所至之邦待公政成甘于敝糲聚其祿廩辨治葬
具歸于京師七喪祔窆禮無違者名教之士翕然稱之
洪州刺史張鎬以故相之重作鎮江西奏授本州長史
莫搖副使懷徠夷落向方率教乾元中江淮凶飢相扇
嘯聚而新安郡負山洞之阻爲害特甚朝廷推其能名
除睦州別駕知州事俄拜監察御史又轉殿中侍御史
賜緋魚袋充江西團練判官軍州庶政多所訪決歲餘
張終於位公上介領留務時吳楚剽劫法禁未一每長

更交代人心輒搖公臨以威重撫以慈惠輯寧封部以待守臣李梁公峴之充江淮選補使也引爲判官多所宏益大厯初轉運使劉尙書晏盛選從事分命四方而江淮上流爲之樞會奏改屯田員外郎兼侍御史知揚子留後累歲就加司封郎中肅給而有守清明而中節有司之移用不匱上國之經費有倫六七年間號爲稱職名實益茂徵拜諫議大夫數與左補闕李翰上封章極言得失未幾以本官知制誥參掌宥密式敷聲明炳然訓辭潤色王度時元載持衡深相器重公愈不自安每因災眚必疏古義且以西漢賜上尊酒之比深警戒

之元終不悟竟及於禍公以傍累貶邵州司戶今上踐位勵精理本徵爲淮西淮南等道黜陟使復拜朝議大夫攝衣登車以澄清風俗爲已任未及行拜權判戶部侍郎專判度支賜金印紫綬先是公兄太傅忠肅公實居其任受邦國之比要制財用之均節物力不屈王府以充出牧也厥職寤廢公乃革煩政振舊綱旣無暴征亦無遺利罷省胥吏冗食者二千餘人明年太府卿張獻恭廣廩庫以受歲杪量入之數又於長安萬年二縣界奏貯米各數十萬石視年之豐耗而爲之發歛人無艱食歲無灾荒雖元凱之智畧壽昌之功利不是過也


上方倚以大任爲執事者所抑出爲蜀州刺史蜀多火
災自古所患俗以爲常無所懲禁公到部逾月令簡事
時吏胥不勞州兵多暇乃省經用之費給大半之庸俾
其埏埴以易蓬葦輦飛鳥革相望如雲授之逾年乃償
其直三歲在郡四封恬然闢田之汙萊三千餘頃復人
之庸亡二千餘戶教之樹藝俾之生植井絡之下人至
于今懷之朝廷陟明表課公實居最有詔徵還旣至拜
兵部侍郎在職數月遷京兆尹兼御史大夫三輔難理
穀下尤甚賊泚之後旱蝗相乘連師十餘萬屯于蒲坂
戎裝兵食仰給京師內安罷毗外贍軍實師克濟而人

不困公之力焉轉刑部侍郎刑法者國之大典所以禁
暴而衛善人也而或巧詆比况因緣爲姦公講求紀律
明爲式例悉以條奏頒于四方吏無舞文人得從善矣
遷秘書監乃奏置五經正本補羣書之缺蓬閣之中粲
然如初復除兵部侍郎累歲改國子祭酒自兵興以來
多趣末流而弃夷道故學者不振而子矜之詩作焉公
曰崇化厲賢本于六籍不學將落吾其憂乎乃表名儒
袁頤韋渠牟列于學官講左氏春秋小戴禮握衣鼓篋
之徒溢乎國庠講誦之聲如在洙泗公所至必化其用
無方方將荷介祉以錫難老亮天工以續舊服人望未

塞以貞元十年二月九日寢疾終于昌化里之私第皇
情軫悼追贈戶部尚書哀榮之禮于公備矣公有識度
風鑒而博愛容衆與朋友交死生以之明於吏職能斷
大事疏達而有節粹和而不流約身以周急絜已而恕
物先師四教克蹈其全中臺六職常居其半無忌之鎮
靜安國之忠厚延壽之恩信惟公兼而有之允所謂邦
之才臣終溫且惠者也龜筮叶吉日月有期易其名者
請徵舊典謹狀三月日故大中大夫守國子祭酒潁川
縣開國男賜紫金魚袋贈戶部尚書韓公故吏某官某
謹上尚書考功夫士之生也躬五常以致用其歿也節

一惠以尊名則善否有章賓實不橈謹按韓公嗣直方
於舊德播功行於清朝通而有守忠而能力樹善匪懈
好謀而成課積中臺道光太學大雅明哲惟公有之考
行飾終古先令典謹撰錄所履布諸有司請徵叔發之
謚以叶周公之法謹上

權載之文集卷第二十一



權載之文集卷第二十一

唐權德輿字載之

墓誌銘

唐故幽州盧龍節度副大使知節度事管內支
 度營田觀察處置押奚契丹兩番經畧盧龍
 軍等使開府儀同三司檢校司徒兼中書令
 幽州大都督府長史上柱國彭城郡王贈太
 師劉公墓誌銘 并序

折木之下幽陵碣石融結網緼誕靈熊渾乃生元臣以
 翼大君惟彭城郡王宣力三代撫封四紀在德宗朝纂

服舊勞以亞丞相得額征伐冬官夏卿再踐六職乃列
台宰乃居師長在順宗朝論道進律就加司空又拜司
徒今皇帝聰明齊聖褒厚功德擢侍中中書令綢繆樞
衡臨長諸侯元袞赤舄崇其物采九命二伯極其名器
勲猷備於贊書終始焯於代家五年秋七月寢疾薨于
莫州之廨舍享年五十四冬十一月歸全于涿州良鄉
縣之某原追錫太師不視朝三日命諫議大夫弔祠法
賻廷尉卿拊節禮冊又詔宰臣德輿銘於壽堂所以加
恩報勞始終滲漏之澤也公姓劉氏諱濟字濟之蜀昭
烈皇帝二十一代孫曾祖宏遠皇檢校司衛卿臨洮軍

使襲彭城郡公贈宋州刺史祖貢皇特進右金吾衛大
將軍贈揚州大都督父烜皇幽州盧龍節度觀察等使
御史大夫贈司空恭公公承是覆露生而岐嶷深而通
直而和宏毅忠肅端明温重固已蘊絕人之姿挺希代
之器始以門子橫經游京師有司擢上第參幽州軍事
轉兵曹掾歷范陽令考績皆爲府中最興元初以太子
家令爲莫州刺史以御史中丞爲行軍司馬凡吏理之
慰薦與師之拊循如良庖之無肯綮良農之無滅裂司
徒卽代有詔奪情節哀順變講信修睦先公之封畛盡
在長帥之威惠畢舉比歲大旱螽蝗爲災絜齊蔬韭默

以心禱甘雨祁祁嘉生萋萋因其豐登示以班制古諸
侯之令典靡不具焉貞元初烏桓誘北方之戎幸吾阻
饑大嘗邊鄙公先計後戰陳兵於郊乃遣單車使者誘
掖教告繇是諸戎反爲公用幹不庭方厥猷茂焉明年
鮮卑墨乙之犯古漁陽其後噉利寇右北平分命左
右軍異道並出然後以中堅衝擊士不離傷師不留行
窬入其阻抵青都山下捕斬首虜以二萬級獲橐駝馬
牛羊萬數十九年林胡率諸部雜衆侵滏于檀薊之北
公親統革車會九國室韋之師以討焉飲馬灤河之上
揚旌冷陁之北戎王棄其國遯去公署南部落刺史爲

王而還登山斲石著北伐銘以見志自大山以東懷和
四隣或歸其天倫或復其地理謁急則解其顛沒居常
則納諸矩度兵興以來氣俗相因或以參敗度或以美
沒禮比屋之人被縵胡而揮孟勞不知書術公乃修先
師祠堂選幼壯孝弟之倫春秋二仲行釋菜鄉飲酒之
禮生徒俎豆若在洙泗和門耽耽公署沉沉自從事掾
史迨紀綱之僕廩稍有倫采章不雜接士必下以詞氣
推賢而容其出處隴西李益樂安任公叔皆以賓介薦
延至郎吏二千石爲近臣良守此又烈丈夫大君子曠
度犖犖之爲也其於勤身裕物生聚教訓祁寒則頌以

祭帛大歎則振其倉廩一方之人蒙被惠和嘉祥交於
動植孝順浹於州壤美化周行無不及焉去年冬王師
問罪於常山公率先蹈厲累上功捷引義慷慨賦詩以
獻詔宰司序引百執事屬和以美大之師次瀛州旣圍
樂壽又遣支兵急攻安平三旬未暇武怒益奮命其子
總以騎士八千先登公親鼓之士皆殊死戰亭午而拔
誅屠無噍類蓋所以宣威制勝于可必也天子錫以寶
劍金甲彤弓旅矢方董諸侯之師將覆其巢俄感厲氣
隱机口占署總軍司馬曰無以吾故而稽天誅悉召戲
下以須王命俄而下霈然之詔宥罪班師加公寵渥已

至大病遺章悃欵不及家事天下之人偉其忠勞總以
君命起於倚廬之中委董戎事由御史大夫爲工部尙
書凡軍師之節制封部之廉察盡如恭公太師之命焉
茹荼雪泣祇服丕矩以國僑之遺愛知公業之不亡生
極榮號沒有愍策揚名以繼志善訓以克家君臣父子
之道斯爲至矣紀大臣所以尊王命懿武事所以壯天
聲敬摭馨香以識冥漠銘曰

帝在法宮推心懋功沈沈彭城秉義納忠幽都朔易賜
履來宅便蕃渥命焜耀嘉績北戎病燕從古以然懷徠
蕩定勇畧昭宣燮和之重公作霖雨師律之嚴公作齊

斧廓開袞袵振奮虓武保大定功庇人尊主卻穀敦悅
乃主成師善經義府公實似之北伐刻銘西征賦詩播
於工歌列在鼎彝壯猷未極大暮如斯華首童牙辛酸
涕洟義方紹續君命吉祿孝在無改恩延必復參差輅
葆澶漫陵谷勒石下泉幽元照燭

唐故河中晉絳慈隰等州節度使支度營田觀

察處置等使開府儀同三司檢校太尉兼中

書令河中尹上柱國延德郡王食邑三千戶

贈太師張公墓誌銘

并序

元和五年冬十二月戊寅太尉兼中書令延德郡王自

河中來朝明年春二月景子發瘍薨于京師務本里第
春秋五十皇帝不視朝五日册贈太師冬十月乙酉歸
全于萬年縣少陵原嗣子檢校工部尚書兼右金吾衛
將軍克讓毀瘠號慕没于倚廬之中追命尚書右僕射
次子太僕少卿克恭檢校右散騎常侍駙馬都尉克禮
等泣遵理命用誠信寢事舉書公之大績大烈請刻石
以識云公諱茂昭字豐明其先燕人九代祖奇北齊右
北平太守因封其地代襲王爵違難出疆雄于北方曾
祖遜乙失活部落刺史祖謚皇開府儀同三司平州刺
史贈太子太傅父孝忠皇義武軍節度易定等州觀察

梅賾之文集卷之三
處置等使檢校司空同中書門下平章事上谷郡王贈
太師謚曰貞武惟公承太傅貞武之遺烈受嚴凝温厚
之全性戴翼其代撫征其人戎容山立盛氣玉色英風
義聲輝耀光明調鼎七歲秉圭三覲爰立於明廷考終
於會朝卓爾拔乎倫類沛然滿乎觀聽凡異姓而王真
食其封於三公備司空司徒太尉之任於三師歷太子
太保太傅之秩累階宰職乃於中書令名器始終與勳
伐俱初公坐當上元寶應之間天下兵興感激代故間
關力用始自掾曹宮衛以至卿寺臺閣金艾采餼祇庸
顯明寶臣物故成德不靖公以弱冠偏師破朝鮮於束

鹿禁旅急病薊人挺災公以中權衡擊脫西平於清苑
此其裕蠱宣力之章章者貞元七年貞武公薨于位朝
廷以公狎貫戎重可輟寧一方繇定州刺史起領留府
禮服外除策勳懋官統節制之師修方伯之職累丁趙
國魏國二太夫人憂喪祭情理一其哀敬凡三奪齊斬
以從王事孝文當陽考禮述職瞻斧扆於法座順宗繼
明保乂齊信執壤奠於翌室今上報本侍祠肅事奉圭
幣於泰壇至於浹洽邴魏優游平勃錯綜事典習通儀
制樹善於廟堂陳謩於穆清迴出功臣之表實行宰相
之事矣前年冬詔武庫禁兵會諸侯之師於常山分道

並出鹵帥絕太行越飛狐是日北道以公爲主於是劔
廢置以闢磧陋悉芻米以給賦輿軍尉裨校待之滿志
供具宴餼無非加等亦旣壓境士皆買餘公與羣帥屈
指環城有日矣恒人以步騎二萬踰木刀溝爲從衝七
里之陣來薄于城公擐甲出壁門徑當其鋒俾其子克
讓與猶子克儉甥陳楚等分掬之設左右翼以待之出
奇決命凡數十合取功於七縱蓄銳以三捷席勝鼓行
橫屍如陵方申盡敵之算俄奉班師之詔因喟然曰自
五十年間兩河多壘縣官以在宥含垢懷和萬方推恩
息人延代賜履或恃長轂且踰短垣至有相依若輔車

相求若市價雖有長智不能自還大丈夫亦當排零雲
而翔慶霄出樊籠以狎閭闔行之自我仁遠乎哉姑請
軍司馬於朝使人狎其理然後以一方之地圖戶版三
軍之馴介伍符授焉子文告令尹之政士爲傳太傅之
法拜章撰日盡室就途舉代得請然後有河內之命磨
幢纔至於理所劍履遽來於轂下沃心體國指掌論邊
慷慨行義涕洟交感方受面命以班詔條嶷然持重爲
守臣表率其或行不俟駕幹不庭方清昆夷掃獯狁然
後銷五兵爲農器驅一代爲壽域此公之心也噓夫以
析木之下將相代家按節股肱羣在諸侯王上而薦紳

文吏擁旄山東廉風俗於武旅之地修班制於戰爭之後是一舉也而二美行焉君子以爲元和理平之嘉瑞雖西漢之白麟黃龍不若也始公割符三年而分闔又四年而進律以州爲都府而爲長吏又七年而爲公明年作相最凡盛大幾三十年君臣極其感會天下仰其風采詔葬法賻率用汾陽王咸寧王故事所不至者歿於終身豈造於物者不與其全歟此吾所以當宁流勳而嘆其用之未極也夫人衛國夫人李氏滄州刺史兼御史中丞陵川郡王固烈之女閼闔慶祉淑明柔嘉由內外音徽以大凡所顧復皆爲善良克讓以勞而貴以

毀而歿克恭以才能歷卿士克禮以淑令儷夫人克禮之季曰沙門宏信宏信之季曰太子舍人克從少府丞克勤光祿丞克正等稟訓尙義執喪知禮闈門積厚名教多之德輿久辱深知謬叅大政疇庸之命親奉聖謦誤德之詞式藏厚載銘曰

太尉兵柄中書理本桓桓令君宣令分闔行旆搖搖馬鳴蕭蕭華袞九命介圭三朝乃率賦輿乃頒詔條先台諒闇霧靈蔽晦詞極切劘義刑風槩皇明光宅績用章大恒碣之間革車所會蹈厲策勳推授交代皇用疇庸徧登三公毅然舉宗來自山東周有申伯漢稱竇融乃

陟其明于河之中行道有福爲仁由已哀榮思福冠耀
終始少陵爲谷幽宅在此中南如礪令聞不已刻銘泉
壚與天壤俱

唐故山南西道節度營田觀察處置等使開府

儀同三司檢校尚書左僕射同中書門下平
章事兼興元尹上柱國馮翊郡王贈太保嚴

公墓誌銘

并序

序曰陰陽和而萬物得君臣合而九功敘內竭忠力外
修班制匡載藩輔勤勞王家安危注意終始尊任明德
大烈爲信臣龜龍者其惟太保馮翊王乎太保諱震字

遐聞本馮翊人後徙家於梓潼曾祖豐皇劍州司馬大
父和本雙流縣尉贈遂州刺史仍代貞晦以至皇考審
綱天爵內充聘問不屈蓋君平湛冥之遺烈也四追命
至尚書左僕射公少有風節忠厚閱大學涉古今之變
器包王佐之畧三命官至合州刺史嚴黃門武時領方
任寘諸牙門副軍攘寇威望大著又三徙至太常卿秩
銀青光祿大夫黃門旣沒公亦居息常以智免不爲利
疚李僕射叔明之至也以前後功勞上聞起家拜渝州
刺史公曰李公中外之姻也今茲推遠無乃誘于私乎
義無所苟移疾罷去是歲遷鳳州刺史充本道節度副

使攝侍御司先是兵火未戢州壤蕭然庸亡斃踣數閭無幾公乃剪其荆棘弔其傷痍毀家以佐軍約已以裕人精力不懈視之如子未周月而四郊襁負感甚以泣曰嚴公之仁父母不若也尋丁內憂詔復厥職充興鳳兩州都團練使血涕拜章三上不允就加殿中侍御史至于御史中丞爵馮翊郡公進封郎國借極儀合賞亦推恩居部十四年考課爲天下最教訓盡其物宜編人有以質理之詞據其肝膈刻巖石而頌公者雖古之善頌不能加焉建中三年陟報政之尤修連帥之職拜梁州刺史御史大夫山南西南節度觀察等使後二歲皇

帝以避狄之亂狩于是邦加戶部尙書馮翊郡王公以漢中形束壤制邇於京師陳蕃主斷咫尺三接清蹕旣駐皇心乃夷大僚法從儲峙肅給事不乏于上入不勞於下於是師期四合士氣百倍神武陰隲諸侯鼓行丹水卽戎乃申恢復之畧塗山執玉克備聲明之禮夏六月詔梁州爲興元府公爲尹遷尙書左僕射眞食二百室其於先事備戒贏糧積甲北達于駱谷成功翼從除道執鈞西至于散關屬車以安重險斯濟明智一德合于宸衷仍歲來朝命賜備厚溫室晏見圓邱侍祠事業焯於功令形容繪於麟閣時所難能而公沛然常以同

谷陰平備邊要害乃建堡壘新廩庾禦寇有金湯之固
焉積粟有水火之饒焉出輿師以會漢南之討而人不
知役操量鼓以濟中都之歉而敏必有程盡慮以幹王
事多方以佐百姓而又精于鑿裁敏于推擇能樹善于
幕庭終翰飛于公朝率由慰薦而後光大至於為宗工
近臣賢大夫良二千石者列於中外書曰慎東乃僚又
曰峻人用章惟公有焉貞元十二年同中書門下平章
事崇德報功于是乎在純誠積戀亟請朝謁上以一方
戎重優詔止之十六年六月癸巳感疾薨于理所春秋
七十六追贈太保廢朝三日弔祠法賻率有加數乃有

兵符命書授公從祖弟代之才既得于官下恩實彰于
身後及輅車之至也又詔有司備禮冊命以其年十月
丁酉葬于長安縣居安鄉某之原前夫人武功郡夫人
蘇氏劍州長史東之之女繼夫人沂國夫人王氏試左
千牛衛長史舟之女咸其柔德以宜家道長子城河中
府士曹叅軍次子協殿中侍御史劍南西川節度推官
嗣子公弼以文學克家仕至國子監主簿以似續疏土
封會稽縣男幼子公貺亦以修詞為州黨所薦祇服義
方綽綽有裕哀敬誠信之禮備焉初公從父兄旆以舍
章好義歷中執法剖符廬山同氣曰堅曰霽曰霏皆卿

才也堅為盛山咸安二郡守霽以殿中侍御史介于岷
峨霍四為尚書郎猶子子聳雅皆用文雅筮仕有名於
時信乎致義貽訓知人之全也弼以德與職忝司言知
大臣之功行捧持官簿哀托名篆是用論次藏諸九原
銘曰憲憲馮翊平康正直柔嘉強毅允是三德端誠啟
廸有大勳力河池理平物遂其生漢中經武人悅是舉
智能扞患忠以衛主謀猷既臧翼戴以功黃道捧日卿
雲從童梁山斯峻碩德斯鎮珞戈金鉉戎輅相印時惟
元老克叶昌運方壯其猷天胡不憇塗芻即遠金石傳
信作銘元堂永識休問

卷第二十一

權載之文集卷第二十二

唐權德輿字載之

墓誌銘

唐故金紫光祿大夫檢校司空兼尚書左僕射
同中書門下平章事上柱國魏國公贈太傅賈
公墓誌銘 并序

德宗皇帝享國二十有七年注意於將相之臣惟魏國
賈公諱耽字敦詩始則四握兵符保釐節制終乃再踐
師長燮和樞極文武致用億寧斯人景鐘書代金鼎和
味咸有一德用平泰階奉綴衣之詔公已感疾先復土

之期公乃捐館屬者太上皇帝重公者碩進加司空今
皇帝憫公徽懿追命太傅春秋七十六佩相印十三年
前史稱賈生通達國體其孫嘉好學世其家其曾孫捐
之建義深切漢元帝爲之罷朱崖郡皆先古之有議論
風節者也曾王父遠則皇長河尉生王父和義沁源主
簿贈揚州大都督生烈考琰之燕居不仕贈尙書左僕
射皆代德之安貞延耀者也公中正仁恕極深研幾究
古今于百氏窮地域于九譯乾元初寰海未靜褐衣危
言始尉太平連辟大鹵二入御史府再爲尙書郎亞尹
北都剖符西河嘉猷循行所莅居最大厯十四年冬十

一月錄大鴻臚貞師於梁叶力羣帥平夷江漢青綬大
封叵赫光明進叅六職節制襄峴載會兵車撫征淮右
徵謁行宮真拜冬官明年以三后之任分正有洛加地
進律察廉唐鄧復摠賦輿鎮于靈昌政成八稔愷悌清
淨於是膺審象之寄贊格天之業中外受授服勞王家
易坤之說曰地道也臣道也惟公有博載之量露生庶
物書洪範之說曰疆弗友剛克變友柔克惟公推寬信
之誠弼亮時化故其撫封也不尙禁厲不施皦察扶導
善氣折銷未萌使貪者讓躁者靜四鄰敬之如神明闔
境愛之如父母其作相也當先皇帝洪覆陰騭財成造

化宗工雋老但以忠厚承清光故公之陽休德輝涵泳
無際靄然和平之運怡然簡易之道至若匪躬詭詞勞
謙不伐者亦何可勝言坦易而周密廣大而潔淨聳然
虛已求天下之才博聞強識通天下之志斯不可及已
所著梁懷王傳碑先君子碑陳祖德以自况載家聲于
可久體要闕達邁乎羣倫撰海內華夷圖及論次地理
之書凡五十有五編頁在中禁傳於域內言方志者以
公名家被病經時屏絕醫術且曰吾以忠信爲口禱死
生爲天理一氣聚散斯焉順之美櫝壽堂自爲終制隤
然委化以啟手足雖從古知命之士所難能焉夫人武

功蘇氏駕部郎中守忠之曾孫處士珣之女有柔儀淑
行歿于中身二十五年矣嗣子疇太常丞協律郎早夭
次子隣太子司議郎少子暉京兆府參軍事馴行孝謹
號吽毀瘠奉二尊裳帷合於九原刻茲樂石以永終古
銘曰麟之儀儀鳳之師師有倬魏公發舒清時外總方
國掃除螟螣入居公台左右皇極於學無不通於士無
不容穆如蘇風叩如華鍾偉材闕議信以發志中行循
性其道易易始初清明紀號永貞惟陽月之朔日兮返
智氣於冥冥下旬逮半兮祖載于庭神休古原兮闕此
音聲前直國門兮旁邇梁傳不唵本兮公之素笳簫啟

路歸此襄樹嗚呼有唐元老兮魏公之墓

唐故金紫光祿大夫守太保致仕贈太傅岐國

公杜公墓誌銘

并序

有唐元老太保岐公諱佑字君卿年七十八以得謝之
歲歲十一月辛未啓手足于京師安仁里皇帝恤然不
視朝三日冊贈太傅弔祠加恩明年夏四月乙酉返真
宅于少陵原大墓公之先自漢建平侯晉當陽侯而下
忠賢輩出積厚昌大以至曾王父行敏皇銀青光祿大
夫荆益二州大都督府長史南陽郡公王父愨皇中散
大夫尚書右司員外郎詳定學士父希望皇銀青光祿

大夫鴻臚卿恒州刺史西河郡太守節終三加至尚書
左僕射公總中餼之精靈蹈明哲之大方體仁以長人
厚德以載物器周代資材爲國華程功績事博達宏裕
在元宗朝以門子筮仕解巾有聲在肅宗朝以郡掾廷
吏賢侯交辟俄以臺郎御史二千石事代宗以六職之
二十聯之重兵符相印事德宗初自度支郎歲中拜小
司徒時當艱急政有均節持權者排陷改蘇饒二州刺
史以亞丞相顓征南方入居左轄出典陝服旋委節旄
貞師淮海凡居鎮十五年厯禮刑二尚書乃進左揆燮
和大政拜章來朝兼理公台綱繆樞極在帝左右順宗

諒闇公攝冢宰因山復土專護其任進掌五教乃平九賦永貞內禪公奉典策今上繼明真授司徒備物采飾褒優章灼推致四時之和茂明萬物之宜初公來朝之明年年及懸車抗章告老上不允厥後詔公每旬一朝訪決重務以公年與德耆尊老不名後八歲天子憫煩公以官職之事恩遂堅請禮優師臣大雅稱方叔元老且非宰政東漢之胡公中庸不理藩服曷若公都將相之重兼文武之全三代論道兩朝總已披摺紳者凡六十年致仕就第極其榮號嚮用五福闇然得之在臨川有愷悌之化泣南海有威懷之畧自淮而南興事任

力三邦之人類其聲詩炳如嵩華刻在金石公既當安危注意之重一人倚愛急宣密啓多所交感嘉保太平承寧諸侯或洒其煩言或導其善氣損怨服義日用不知至有執介圭朝象魏冠功臣之表近天子之光爲時龜龍公所樞極喜士容物羣而不黨理遣情恕犯而不校一言定交生死以之趨人之急惟恐不及不徼福不乞靈物恠氣燄不接于心術誠明坦蕩自得于天理中正之外無自入焉國門南出杜陵故地畎清流疏灌叢觴竿引滿金石合奏時賢儁人結轍在門極謝安之林墅異陸賈之裝橐鄉耆時會鷗鳥不驚又以見公放懷

推仁無不逮也至若閱天下之義理究先王之法志著
通典二百篇誕章閱議錯綜今古經代立言之旨備焉
凡推轂多士絲幕廷而奮迅者近於百輩將相六職左
右曹臺以至列藩二千石不可勝書夫人安定郡梁氏
蘇州常熟縣令幼睦之女也專柔淑慎動有儀矩先於
公歿幾三十年矣嗣子司農少卿師損與其弟昭應縣
令式方駕部員外郎從郁等皆以材能孝謹爲卿大夫
元士推擇之際以吏資蔭麻之下有淑聲儼然摧剝相
視無怙誠信愛敬實加于人以德輿嘗忝府辟晚聯台
座每荷同升之義盍陳無愧之辭直書德輝以鏤幽礎

銘曰

君子之用可以大受斤斤岐公祇事三后暮明盛時其
道甚夷乃將乃相乃公乃師六符鯨平五福叢滋齊之
溫良商之慈愛推本性術發舒光大宣力中外勤勞翼
戴懸車乞身知進知退歲在大梁月生一陽以佚以息
忽乎茫茫厥襚納書禮優職喪智氣在上昭明發揚少
陵鬱鬱著蔡叶吉宰本號風虞泉落日吁嗟岐公居此
室

唐故中大夫守尚書工部侍郎兼御史大夫史
館修撰上柱國賜紫金魚袋充弔贈吐番使贈

禮部尚書張公墓誌銘

并序

有唐博物通理之君子常山張君諱薦字孝舉以小司空亞丞相將大君之命結絕域之成貞元甲申歲夏六月出車國門在途被病秋七月戊寅復左轂于青海之西其孤敦簡與軍吏章騎護轎車而東明年春三月至于京師天子憫然加恩追崇太宗伯俾尚書郎弔祠職喪法賻秋七月癸酉安宅于某原君之先漢常山景王耳之後也曾王父義皇澤州治中王父文成司門員外郎贈國子司業烈考不忒揚州天長縣令贈睦州刺史代名儒學至君章大七歲善屬詩十歲通太史公書未

弱冠有令聲于江湖間優遊恬智博貫古今約已求志視苟進如探湯東諸侯表其材以聞廷命左右禦率府兵曹叅軍尋以傳車徵加史館修撰以勞授陽翟縣尉朝廷難諷議禮文之任拜左拾遺換太常博士東求備茂遷工部員外郎轉郎中修保氏之職擢左諫議大夫爲權倖者所侵改秘書少監用久次升爲秘書監前年戎王發導譯請棄細故以休寧西方先皇帝思所以臨存卽敘故有冬官南臺之拜自筮仕至沒身與載筆終始書盛聖一王之法考周禮魯史修明褒貶好古者謂君辨裁而直其爲禮官講貫洽聞統同辨異之大乖疑

隱微之旨皆折中於君而優爲之貞元郊祀告類報本
再以臺郎攝贊大儀知禮者謂之闕達而敏使節法冠
從古所難始則內廷參侍出疆命介次則專席委重登
車有光滅邊貢之蹄轍紆齊人之杼軸四牡所履陰方
洽驩及是以撫和憬俗非君莫可竟以靡盬終于絕漠
感慨者謂君盡瘁而忠凡歷十官而八在歷其他三帖
職二承攝一追命春秋六十一君子之道有初有終悲
夫惟君端直廉正醇醲博厚儼若彝器中涵靈龜以庸
制祿故不至隱約以道藩身故不至燠灼中立大朝爲
名卿碩儒和而不同直而不詐東陽之長者富平之默

識繫君有焉初興元貞元之間轂下饑旱乘輿避正殿
君引古抗章條其日數詳定昭德皇后廟樂及太儀位
號儀大臣祔廟鼓吹之法皆稱典義而爲故事有文集
三十卷犖犖然君子之詞也上疏陳史職利弊指明切
寔有裨王度著史遁先生傳臣節之貞厲見焉纂十祖
贊家風之德善章焉至若宰輔傳畧靈恠集同僚籍寓
居錄等又數十編自成一家之言初娶太原鄔氏某官
之女也繼室安平郡陳氏某官某之女柔嘉有儀而賦
命不稱嗣子敦靖爲宮衛紀綱掾次曰敦簡叅鄭州軍
事次曰敦業敦謙敦紹等克家孝謹執禮哀敬以德輿

再同玉堂金華之署承先子之歡里仁服義爲日固久
泣狀遺懿以表識爲請是用舉其大而畧其細銘諸墓
門其詞曰

天下圭表繫乎史職印印冬官二紀良直王者惠澤先
於遠人皇皇使軒三抵殊鄰禮以節事每馳極摯文以
導誠克諧雅聲思若雲鬱心猶砥平懷黃刻采兮寔稱
其服志力方壯兮奄然不淑有生必化兮邃古同塗憫
君轉祿兮來自外區難也收子兮故人刻石湛恩綏印
兮賁此幽窆

唐故銀青光祿大夫守吏部尚書兼御史大夫

充諸道鹽鐵轉運等使上柱國趙郡開國公贈

尚書右僕射李公墓誌銘

并序

維元和四年夏五月丁卯冢宰趙郡公與寢疾薨于永
崇里享年六十三天子憫然不視朝追命右僕射冬十
月乙酉返葬于洛師緱氏縣芝田鄉之大墓公字令淑
趙郡贊皇人曾祖知讓皇河南府長水縣主簿祖承允
江州別駕贈太府少卿父嶷右武衛錄事參軍飾終四
加至尚書右僕射代載德善至公昌大始以經明筮仕
爲華州參軍試言超絕補鄠縣尉登朝爲監察御史殿
中侍御史由美原縣令課最爲刑部員外郎由萬年縣

爲給事中以御史中丞領潭州刺史湖南觀察使就加
右散騎常侍領洪州刺史江南觀察使就加御史大夫
由二府報政入爲兵部侍郎在途加度支鹽鐵轉運副
使至止踰月代今司徒岐公爲使明年遷兵部尙書間
一歲轉吏部尙書總八柄平九賦左右理道以紓元元
天子方推心竦意倚以爲相奄然大病斯可痛已公温
重方嚴愷悌忠清得洪範之正直大雅之明哲強志特
立爲儒門吏師中臺草議左曹還詔法程之下無尤違
分畫之下無奇袤其爲一方修班制建長利布以休甌
樹之風聲大凡都府歲秒使刻深吏周行支郡鉤據泉

貨二千石不相聊如桎杻然公則分命部從事覽觀禮
俗問人疾苦廉吏善否而已至有經用之羨使郡自爲
理得以蠲乏困補庸亡府無私焉四履之內遇凶旱水
溢損有餘以均不足農里無大乏官司無宿憂引邦鄉
碩生勤學講藝導彼輕惰率循教化皆有聲詩揭于康
莊其制國用也調盈虛御輕重阜齊人之業而地不加
賦偉公家之急而利無所深先是池澤之稅因緣爲奸
牢盆以私幣貨竊濫公則去一朝之便質終歲之成變
其苦窳以寬物力盈入之數不可勝條上嗣位之歲發
武庫禁兵以誅劉闢三蜀之饋不乏於軍千金之費不

征于人揚天聲於井絡斷戎首於齊斧是皆謀猷大績
經理大本豈止于漢廷桑大夫耿中丞區區然商功利
析秋毫而已哉其爲天官已嬰寢患猶與郎吏切劘奏
書去繳繞之科禁絕私回於肯吏士之多調者多受賜
焉內外掃之際精爽不亂與上介言職業雖康寧晏閒
之不若君子以爲難自解巾褐至捐館舍凡歷十六官
利刃所觸大車所載文理聰明卓冠出倫規爲密靜矩
度章灼大吏之所表的諸公之嚴重其文采英精實循
道體要不爲曼辭其術學博浹折中定疑而不理章句
嘉士尊賢開懷盍簪絲桐博奕談笑嗚喙每有餘裕而

無留事志在端正百度儀型四方以馨明宏濟爲已任
而績用未久斯吾君所以當宁流嘆而衆君子失聲怛
化豈虛也哉凡三合姓初曰范陽盧夫人太子賓客幼
平之女次京兆韋氏二夫人潁州刺史允洎膳部員外
郎襄之女以從祖妹而繼室焉皆以華腴淑哲不幸凋
落長子紹左衛兵曹參軍鳳翔節度巡官專謹有馴行
嗣子繼京兆府參軍飾躬強學幼子紵編皆以門蔭在
仕次紹繼等泣次先公官簿事業請書墓石且以理命
見托故不得讓焉銘曰

大行之東全趙古風鍾懿美兮左車武毅元禮文事叢

慶祉兮天官冢卿莊重廉清大君子兮精金斷割良玉
特達視所履兮表率二邦鰥孤惠康斯樂只兮切齊八
政底慎徽令有經紀兮宜登上台以賦羣才命造已兮
緱原厚地追琢欵識神在此兮

權載之文集卷第二十三

唐權德輿字載之

墓誌銘

唐故太常卿贈刑部尚書韋公墓誌銘

并序

維貞元十七年秋七月乙酉太常韋公諱渠卒年五十
三啟手足于靖恭里戊子詔書以大司寇印綬告第其
孤博古近古等號眺崩慕以冬十一月甲子著與蔡叶
告窆于某原其徽數用天子之追命其誠儉用先人之
理命既而續書出處之義行官業請斲圓石藏于塋內
云公字某京兆杜陵人自楚元王傅漢丞相節侯恭侯

而下其族盛大天爵人爵沛然兩集六代祖範隨郿城
莊公會祖餘慶皇坊州刺史祖景駿房州刺史父永著
作郎兼蘇州司馬同氣齊名皆以文學論著爲賢卿大
夫而著作志氣閎邁落落有奇節公卽第若干子也年
十二善賦詩屬書未弱冠博極今古尤精史藉力行過
人且以爲夫子在魯則衣縫掖在宋則冠章甫范蠡在
陶爲朱公在齊爲鴟夷子皮於是傳心印之法於金陵
授谷神之道于華陽或爲塵外人或爲遺名子其達觀
也不名一行其元同也會歸三教蓋周流揭厲無入而
不自得焉終以儒服服素王之道大厯末丁著作府君

憂倚廬于壤樹之側以純孝感嘉生廉車列土州閭登
敬貞元二年起家拜校書郎五年轉左武衛騎曹掾皆
爲知己者從事八年大成均表其名經可領學徒遷四
門博士十二年夏承詔與近臣名儒緇黃大士講議于
麟德殿上以爲能拜秘書郎尋獻詩七百字極其文采
歲中厯右補闕左諫議大夫再當言責之地切劘獻替
數進熟于君規事建議麤起鋒出卓犖頡頏取重於時
三接日旰公卿仰其風采薦巖穴有道之士以待兩言
其他推轂皆一言感槩就義若渴見不善如探湯與夫
陰拱自愛持容容之計者固爲愈矣間一歲遷太府卿

錫以命服又間一歲遷太常卿泉藏受用之法絲絕禮
文之事峻科禁以絕其私酌儀制而合于中被病乞告
禮愈優而不得請壽與志皆未極而歿悲夫公敏於歌
詩縟采綺合大凡文集若干卷撰莊子會釋老子金剛
經釋文孝經維摩經疏三教會宗圖共十餘萬言又奏
修貞元新集開元後禮二十卷詔下有司令行子代當
其憫坐馳哀弱喪也泛然若不滄於物及披肝膽承顧
問也毅然若不有其身起儒官博士十三年踐文石
登玉堂赤車金印燠灼中外其所以得之者無他腸故
也禮器曰觀其發而知其人之智洪範曰俊民用章噫

嘻太常之道其智而俊歟雅為晉國韓公魯郡顏公之
所薦寵魯公嘗稱遺名子洞徹三教讀佛書儒書道書
向三萬卷又多言其神奇之跡今茲不書始書其章明
宏大者用識窳窳一以申嘗僚之義一以遂孝子之心
其銘曰

儒有奉常兮旁觀三元強志敏心兮詞義紛綸初委約
以卷懷終發舒而顯尊出四門兮登三閣居保氏兮諤
諤開知囊以當法座印纍纍而綬若若天衢凌厲兮才
較群艾服官政兮年中身飈截道兮駟過隙夫何一烝
聚散之沄沄逝者固不可作兮鏤貞堅于墓門

唐故朝議大夫太子右庶子上柱國賜紫金魚

袋韋君墓誌銘

并序

君諱聿字某京兆杜陵人六代祖郢城莊公範有勳力於周隋間範之孫機實居大農艱貞忠厚書在國史機之孫贈太子少保岳八子爲二千石皆有風績生贈太子太師貴仕至藍田尉清方粹遠天爵自修有才子四人君爲冢嗣承少保太師祖禰之慶故延耀發舒于君伯仲之間少開敏有才智通覽書記不爲章句儒天寶中以門子奉清廟齋祠試言會府補宣州南陵尉歷揚州天長丞越州兵曹掾涇原節將表爲參軍以廷尉平

攝監察御史未及行授揚州錄事參軍尋爲本府薦拜秘書郎兼殿中侍御史以官名心瞿換太子司議郎俄擢侍御史檢校祠部員外郎皆爲淮南從事貞元十二年徵爲水部員外轉比部郎中德宗召見賜以金紫命服俄遷衛尉少卿國子司業用久次拜右庶子元和三年九月景戌以官壽歿于長興里春秋七十五君初筮仕已辯疑摘伏全活枉濫厥後率爲守臣薦引歷丞史紀綱掾皆以理効聞自簪法冠贊戎重或筦府政以修吏理若摻籩鍾而揮孟勞度音觸物非輩類所及所奉之主卽故居守杜扶風公今司徒岐公其人也介弟太

尉南康忠武王有大烈于王家同氣致美士林景行不
乘勢以燻灼每虛懷而坦蕩再為尚書郎業以修計部
稽百事財用之數嘗欲覆視禁軍董正其簿書雖事適
中止而聞者竦嘆洎佐師氏相東朝克詳憲令以中宜
適朝請休沐或近郊考勝漢廷臣賢士大夫車常接轂
必醞酒理具懽怡晏晏交有久要而言無瑕謫平夷疏達
造適遺累有君子之槩焉與夫狗彘枯槁局束于一代
者異日論也素強力無疹痲奄忽啟手足庸詎知非五
福之康寧以考終命耶政公以元老總國柄每退朝清
問日與君晏言一旦相失涕洟恒化夫人滎陽縣君鄭

氏某官某之女淑温仁順為六姻法凡合體若干年先
於君歿者半歲嗣子行檢進士第自協律郎移朗州司
戶有文業為素藝器幹次子業行修皆修詞與計偕次
某等顯經術某等尚幼女子有行者四人在襁抱者三
人子壻某官某某官某等皆華宗良幹匍匐會事行檢
等令龜探著得十月某甲子吉以德輿同辟公府周知
所履將琢圓石見各直書銘曰

桂陽之系郟城之裔伊上族兮亞于大僚相彼東朝介
豐福兮吉凶糾纏以息口口斯不淑兮直城南偏即遠
歸全覆夏屋兮茲焉追琢以識真漠表陵谷兮

唐故大中大夫守太子賓客上柱國襄陽縣開國男賜紫金魚袋羅公墓誌銘 并序

公諱珣其先會稽人蜀廣漢太守蒙晉西鄂節侯憲給事中龔皆以茂績焯於前載曾祖彥榮皇同州長史祖思崇韶睦常三州刺史父懷操桂州興安縣令贈華州刺史實有清行藏於家牒公早孤貧篤志好學舅氏徐吏部浩器以遠大以其兄之子妻之寶應初上書言事延命太祝由吏資轉長水河南二縣尉萬年主簿分董計司湘中之賦授大理司直嗣曹王以宗室吏師節制洪荆襄三府公皆贊其師律厯監察御史殿中侍御史

祠部員外郎府除徵爲奉天令刺盧壽二州就加御史中丞入爲司農卿京兆尹移疾乞告改太子賓客凡蒞十六官考績四十四年宏厚有局度辨論通吏事敏而文忠而能力緣飾楨幹所居可紀初結綬蒲歲調於有司會舅氏居選部上其名於宰府試言二篇比興菁華及賓曹邨兼管書奏下安陸應山露布於朝矢石雨下舍章迅發介漢南也武人因府喪以刳軍寔壽張無狀公立斬首惡十餘曹且命環棘於廷俾投所取以贖罪間一日而金幣皆復微公之才則一方幾亂其宰陵邑內官劾午吏有因緣橫猾以犯禁者榜笞至死人用知

懼凡田里之闕庸亡之徠皆倍于始至而不書於籍廬江劇部號爲難理強家占田而寡人無告鄉校廢落而冗吏猥多被病者捨醫事求淫祀公皆去其弊而圖其利人人得盡四支之敏而務十全之術修起經師弟子以理庠塾每歲以廉茂計偕者倍於他邦化條簡易和氣浹洽靈芝產白雀至連率令司徒岐公上其理狀詔錫紫金命服壽陽與蔡人接壤有州師萬數天子命中國人監理視方任焉訓武備飭文事嚴重廉清理行第一入以材能爲九卿典司金穀由朱邑之課第循牟融之事任其尹京轂不施鉤距嘗請減縣內平糴之半且

以嘗賦輸於公上者充焉精力惠養人蒙其利前史稱吏不廉平則理道衰旋觀夫人之所蒞有以見朝廷理道之所繇也年耆疹毒乃喟然曰吾以澤國書生累至二千石居大農內史止足休老其在茲乎拜章數上雖處以儲賓優秩而不得謝以元和四年冬十一月啟手足於宣平里之私第逾懸車者四歲夫人東海徐氏同州司馬參軍浚之息女婦道柔正不躋偕老嗣子讓卿舉進士博學宏詞能直言極諫三登甲科爲校書郎咸陽縣尉毀瘠孺慕如不欲生號奉轎車以某月日歸祔于會稽之兆域以德輿與公同服大僚頃歲奉行中執

法之詔又嘗讀亡友楊懋公刻金石遺愛之說公之率履固爲周知識諸窳窳不敢辭也銘曰

懿彼君子兮有猷有守其心不回兮其進不苟中外賦政兮人之父母金艾被體兮華纓耀首月在子兮歲居丑復東榮兮寢北牖火歛列兮纁元紐歸鮮原兮巾廣柳邱夷谷變兮何不有追琢貞堅兮天地久

唐故朝散大夫守秘書少監致仕周君墓誌銘

并序

君諱渭字兆師其先汝南人六代祖衡仕隋爲淮陰郡司馬子孫因家焉曾祖頂口杭州長史祖守則婺州金

華丞父隨州棗陽令三葉沉晦纓韜未華皆以義行稱於州里君服儒篤學工爲詞賦大厯末常潘繼居小宗伯號爲得士君與令弟澈聯中正鵠于二有司之下是歲孝文帝嗣大統詳延諸生又以貞師伐謀對有明法授汝州襄城尉時太傅崔文貞公以匪躬當國兼綜書殿表爲校理厯富平長安尉拜監察御史董選補于南方南方吏理清而風俗阜抑君是賴復命其勞轉殿中侍御史平理詔獄清公不許遷膳部員外郎祠部郎中典曹草議遵道循性居太微積星之位十年不徙官其有據利權大竇燻灼於時者君必畏而遠之居易自是

前歲凶旱詔罷郡國選舉慮穀下艱食之不給也君抗
疏以爲無肆眚且久得非濫刑失職者含冤以整和氣
邪臣以爲答于天戒者在此不在彼雖留中不下而士
友多之上皇踐阼章敘時儻君已感疾拜章請老有詔
授秘書少監以優遂之先築室于崇德里有嘉樹修竹
休沐吟咏以文自娛每得一佳句如獲官祿恬于進取
用此故也赤紱華髮燕居考詳方膏精神以順和理永
貞元年冬十一月甲戌奄然大病以啟手足春秋六十
六夫人河東薛氏將作監丞腴公之女雅有儀操有子
三人從魯從禮從質克稟風訓以明年二月某甲子號

奉裳帷返葬于緱山縣唐興鄉之北原刻石銘墓以昭
景行銘曰

猗歟周君探六義思無邪詞頗類安久次復郎吏謝浮
榮佐中秘洛師緱原潛厚地刻勒貞珉書此誌

唐故正議大夫衛尉少卿聞喜縣開國伯賜紫

金魚袋裴君墓誌銘

并序

君諱會字某河南聞喜人有唐元老左僕射贈司空貞
孝公之元子惟司空左右肅宗壽與位侔百順五福宜
鍾厥後雖不能嗣居公相者必用攸好德考終命焉君
孝悌睦友慎厚敬讓直而和柔而不犯馴行克家學古

入官乾元初筮仕太常授奉禮郎再轉至主簿廣德初以宰相子行修飾特加正議大夫累登東朝爲中舍人率更令仍副少府又貳殿中令司徒北平王之節制河東也表爲戎左檢校吏部郎中貞元元年旱蝗相乘列郡災耗君奉府檄莅于定襄勞徠安集有異等之効就加金印紫綬以疇其能五年從北平朝京師真拜膳部郎中八年轉衛尉少卿九年戊申終于位享年四十六噫嘻君有甘白之姿而受采和有惠蘇之量而蒙覆露徊翔省寺周旋官業質於典憲故不踰詳於奏議而有章盡齊敬於宗廟惇愷悌於族屬以友輔仁以酒全神

忘懷久次未嘗諂黷雖不踐右職立章章之效而歷官十一列爵故里辟三公府以政事稱被薦紳奉朝請者逾二十年無過言無違德啟其手足歸全於先公君子以爲難再娶皆博陵崔氏前夫人新繁令平之女繼夫人大理評事陽元之女咸有婦順不幸早夭其孤曰定爲左千牛備身定弟密密弟字年甫成童咨於叔父前京兆府戶曹向以十月某日返葬于東周萬安山之南原二夫人附焉孝子悌弟用誠信襄事禮文家法率履無違言世功冠族者以裴氏爲河東盛閥自魏翼州刺史徽種德滋大纂承紹續十有二葉至贈中書舍人義

宏仕至梓州元武丞君之大王父也舍人生贈司空
懋給事中杭鄧二州刺史君之王父也門業風緒天下
稱之今纂書其畧刻于墓石銘曰
濟濟德門温温恭人司空之子司徒之寶位止亞御年
不中身遽歸其全乃返乎真上有宰樹兮下有野土閔
此幽宅兮萬安之下

權載之文集卷第二十四

唐權德輿字載之

墓誌銘

唐故金紫光祿大夫檢校禮部尚書使持節都

督廣州諸軍事兼廣州刺史御史大夫充嶺南

節度支度營田觀察處置本管經畧等使東海

郡開國公贈太子少保徐公墓誌銘 并序

公諱申字維降東海鄒人五代祖周宣州刺史瓌瓌生

隨江州司馬晏晏生吉州太和丞仁澈仁澈生皇吏部

郎中諫議大夫元之元之生公烈考汾州司戶參軍贈

信州刺史大凡自偃王而下用仁義世其家諫議之文
行信州之廉退及公始大永泰初當著作賈常侍至操
柄儀曹舉士林之菁華進士上第調補秘書正字四征
翹車相屬于途望公舉趾以爲重九江而西服嶺而南
與朔寒被邊之地聯爲命介歷大理評事司直監察御
史太子司議郎殿中侍御史錫以章綬冀國路公之誅
哥舒晃也公以從事主謀居多嗣曹王之守鍾陵而誅
李希烈也公以長史行刺史事調州師以護饒道厥勞
茂焉江漢旣清拜韶州刺史先是長史不任職官曹弛
廢刺史寓於理下邑之令丞與編人雜處比屋庸亡公

田爲蕪公乃假之耕牛賦與種食人人自占視其力而
爲之制歲乃善熟積爲倉箱於是計徒庸程日力作爲
城寺大治垣屋廡置市列道橋器用皆備焉罷去之日
夫家名數倍差於始至而不書于籍邑子張捷等五百
人獻其理狀得請於觀察府以函奏書請立碑祠公瞿
然止之曰此刺史職耳一旦上聞與沽伐者何異所不
忍爲也府不能奪改合州刺史以先漢陽郡太夫人兆
域未祔表求改葬總麻旣除以御史中丞領景州刺史
自兵興四十年山東諸侯率強大驕蹇郡二千石多自
命於轅門蓋縣官息入舍垢而因緣漸漬然也至是朝

廷以滄州負海勁兵處乃建節將幕庭裂屬城以置支郡會其帥亦請缺守於朝朝論難之二府比推擇未稱因召公入見而面命焉錫命服文馬縉錢五十萬尋加節度副使中朝之條職憲令始被于景人是歲節度使來朝既從父兄為代表公以本官為軍司馬陳情去職徵還京師復以御史中丞出莅邕州領經畧之任開南蠻徼道宣明威信種人黃氏納質請命化條風行獷俗以清明年中貴人持兵符詔書至部以御史大夫督南海二十一州軍事而節制焉前此守臣物故軍吏乘變竊發印符易置部校拔用惡少年百輩軍中幾亂相率

亡命公既至捕誅首惡悉原諸誣誤者夷越負險阻白晝攻剽芟夷根株使無遺類然後布以寬大人安作業溟漲之外巨賈萬艦通岸南金充牣狎至天子之恩澤賜予聲明物采皆待焉上應急宣以馳疾傳下無強賈用絕奸利和輯招徠外區懷之則四封之內其理可知也朝典疇庸進階至銀青光祿大夫時庸蜀失阻公密疏請發卒徒五千循伏波故道由焚蠻抵岷峨以會師期誅不恪詔可其奏就加禮部尚書秩正三品疏封東海命書未及至奄捐館舍薨以太子少保印綬弔祠稱焉是歲改元元和公之生七十年矣嗚呼以文發身以

智經物惠和直温忠恪廉清佐賢侯長轂皆有理効在
韶也興事功在景也修班制朗寧察風俗南海整師律
以八命居六官攸好德考終命其蹈履之全乎夫人渤海
高氏早歿繼夫人扶風郡夫人竇氏柔明有賢行嗣
子右衛倉曹元弼似續文敏號眺毀慕以某月日寧神
于東都偃師縣之某原乃刻石以傳永久銘曰
噫徐公有質有文有義有仁名聲章明適群倫兮噫徐
公不忝不求不緇不磷贊佐四征暢嘉聞兮公之牧人
于韶于景于邕于廣朱轡照路利攸往兮公之愛人以
清以靜以惠以養流庸集附如影響兮如何不庸奄忽

鞠凶著龜之同天地之中吁嗟乎徐公

唐故尚書工部員外郎贈禮部尚書王公收葬

墓誌銘 并序

元和十年秋故兵部尚書贈尚書右僕射王公之孤曰
元秦元質元弼等舉其王考贈禮部尚書之殯于玉山
王妣贈隴西郡太夫人李氏之窆于潁陽泣問龜策得
八月壬寅安祔于萬年縣鳳樓原吉克成先志孝孫之
心也尚書諱端字某太原人曾祖某某官祖某某官代
理儒術至公以文學策名舉進士宏詞連得雋於春官
天官之下解巾崇文館校書郎改右驍衛兵曹掾隴石

節度奏授大理評事為其上介天寶十年拜監察御史
十三年轉殿中侍御史俄以本官內供奉贊東京畿採
訪之重十四年遷工部員外郎謝病請長告南浮江湖
因寓幽陵兵亂啟手足行次春秋若干是歲乾元二
年也娶隴西李氏隋太師申國公穆五代孫吏部郎中
問政之孫城門郎韶之女賢明有儀操生子三人長曰
綽被服緇褐修無生法次曰紆以文章繼公用雋造履
清近諫垣載筆在帝左右綱紀都曹典司庫兵厯外郎
正郎直誠厚行為士君子儀矩次曰紹繇小司徒三為
六官於外則保釐東郊節制徐方當德宗朝嚮納尊信

漢廷臣莫二時上馭天下歲久宰政之外大僚往往以
辨智材能獻熟得君者或險夬以務伎害或妄誣以取
快愜僕射則和平將順不疚不惑人到于今稱之故公
以義方昭慶再受二千石五曹之錫積厚流光可勝言
哉先遠襄事未得吉卜而歿元泰等茹荼繼志經啟鮮
原以德輿與其先人同於汴東江西從事同為郎吏同
為尚書藐然無容見託傳信雖文之朴野其可辭乎銘
曰

尚書為父僕射為子家聲章章令聞不已萬有千年兮
邱封在此

唐故朝散大夫使持節都督容州諸軍事守容
州刺史兼侍御史充本管經畧招討處置等使

譙縣開國男賜紫金魚袋戴公墓誌銘 并序

維貞元五年夏四月容州刺史經畧使侍御史譙縣男
戴公至部之三月以疾受代廻車甌駱六月甲申次于
清遠峽而薨春秋五十八明年正月庚申返葬于金壇
玉京原之舊封宜敘世德以識幽窆云公諱叔倫字幼
公本譙國人其先在宋為公族於漢為儒宗東漢則有
司徒涉西晉則有司農遠遼後南渡始居丹徒八葉至
宋臨湘侯明寶曾孫梁左丞曷曷元孫皇德州司士好

問公之曾王父也王父修譽父眷用皆自縻天爵不顧
翹車傳次君之禮文盡通奧旨師安道之晦德尤惡知
名故世風純慶及公而發公早以詞藝振嘉閩中以材
術商功利終以理行敷教化率履素王之訓周旋君子
之儒淑聲休明苾芬四暢初樞衣於蘭陵蕭茂挺以文
學政事見稱蕭門文本菁華而長於比興祭如采章鏘
如珩璜鼓鐘于宮累辟大府分命于計相也則為湖南
河南留後自秘書正字三遷至監察御史曳裾于賢王
也則為湖南江西上介由大理司直再轉至尚書祠部
郎中其阜人成化也則東陽一同之人沐旬歲之治撫

人歿三年之惠容人被踰月之教夔人聞詔而歡承訃而哀不及蒙其澤歷官十一而雲安不書所至之邦必刻金石始在轉運府也董賦于南荆會蜀將楊琳擁徒阻命詔書告諭初無革志宵引銳卒劫魯使臣曰歸我金幣可以紓死公山立不撓勇生于仁端其詞氣強於師旅暴叛知感乞盟于公黎明率其徒西嚮拜泣指期詣闕冢臣列狀天子召對而推功于府不伐其勞時談翕然勇讓具舉其在臨川也清明仁恕多省費力畧蜀郡崇儒之化南陽均水之法精力區處民以便安田壤耕闢獄犴清淨居一年璽書褒異就加金紫未幾而有

容州之拜且都府所治列城十三訓戎撫俗之任招徠式遏之寄非通方明畧無以威懷蓋皇慈所軫先於柔遠方將愷悌於夷落致風俗于休嘉議者以九伯二南可跂而至天則不弔未如之何君直清篤厚博物通理有大學之明誠天雅之疏達靜如淵泉動如鎔干不繼不磷與令問始終起布衣儒服位視方隅歸全之日纔具祭器去國見麾幢之盛返葬備祔輶之儀列松檟于舊封展牲牢于新薦哀榮之禮鄉黨稱焉初公娶京兆韋氏永州長史采之女繼室以博陵崔氏殿中侍御史殷之女皆淑明柔嘉不幸早世允子曰邳曰邾年甫及

亂哀如成人公仲兄新城長伯倫以子夙承公歡且有
遺託既不獲讓是用直書銘曰

信都九江文禮章章百代彌光司徒佐漢司農匡晉乃
熾而昌世無遺德時有通塞或行或藏克生容州貴爲
諸侯其道直方政成中和播爲頌歌化被二邦列爵疏
土燦爛龜組鑿聲鏘鏘宜享繁祉以媚天子今也則亡
返葬故里僊山之趾德音不忘

唐故朝散大夫使持節饒州諸軍事守饒州刺

史上柱國崔君墓誌銘

并序

博陵崔氏爲山東右族以政事方直稱者曰饒州刺史

諱適字某貞元十四年某月甲子寢疾終于所部之廨

舍春秋若干君仁厚信實方嚴清厲事無枝葉而願言

必踐交不諂黷而與人必誠深于士行精於吏職蓋其

天性然也一命爲懷州參軍累遷至大理評事司直監

察御史好時武功二縣令常絳二州司馬乃理富平遂

佐興元貞元十一年春以西諸侯之師轉粟調食特拜

倉部郎中兼御史中丞以董其事其年冬徵拜衛尉少

卿明年改鄧州刺史摩蓋將行又換鄱陽感官十五竟

未充量其爲御史也賈常侍至以才名尹轂下實所慰

薦爲之賓介蔣常侍沈以公廉幹河運交辟將事宏助

居多其宰封畿也縣鄙之地直于西郊禁衛之師勤于左次事爲之節官修其方軍與人安闔境謠誦其佐晉陵也晉國韓公當撫封之重署爲推官輶傳所至平反審克假守新定新定之人宜之薄于進取未數月引去其領陵邑也充奉肅敬里閭均定黠吏強家望風累息相率屏匿者十八九其分憂爲邦約已惠人樂易而知禁清明而不擾此皆厯職必聞之效也至若章章尤著爲士君子之所景行者則奉使西土鄙能言之縣官以乘塞宿兵旌旄相望饋饗之重非君莫可旣而經費出納制於中臺尅伐之人順非言利大率以布帛之不中

于度不鬻于市者積以歛濫備其名物移用於軍增三倍之價平糴于人無一時之蓄掠是根本命爲奇贏旣衰邊備實蔽理道時有覆視誨其相蒙徒列簿書之文不登釜鍾之量因緣謬巧觸類而起君受命不苟臨事風生條其積弊盡達聰聽雖狷狷之仄營營之飛置於度外不直不已連章上懇詞旨深切羣情惴駭處之恬然謝病乞告終無所屈皇明嘉納入亞九卿時縉紳之士多以憑暴爲戒怵迫附離而不能自固者多矣如君之特立剛毅不更其守古之儒行何以加焉此德輿所以受其孤之哀請而不敢辭也君之曾祖元基皇朝散

大夫會州長史祖紹先皇揚州揚子縣尉父貝皇大理
司直兼河南河陰縣令代名士行裕是遺烈初君娶于
某氏某官之女生子曰包而歿繼室以某氏某官某之
女皆有淑行如君之志以十四年某月日叶用吉卜祔
窆于河中某縣鄉原之舊封禮也初包以德輿朴而好
直且嘗奉行君之命書者四乃列其官簿次第俾識于
墓石既而包毀瘠滅性天于倚廬之中諾其請矣故銘
之曰

崔君之直兮不枉尺兮崔君之正兮不由徑兮展如之
人宜錫蕃祉兮天實奈何一麾過已兮襜褕惟裳來自
鄱之陽兮峩峩邱封葬于河之東兮刻此貞珉識清風
兮

唐故使持節歙州諸軍事守歙州刺史賜緋魚

袋陸君墓誌銘 并序

君諱參字公佐吳郡人曾祖某某官考某某官君蚤孤
與兄隱居于越越有佳山水率子弟耕汲於其中日修
桑門之法墮落人事貞元初兄既歿始為宗姻二友所
強慨然有應知己之心錄試佐環衛感大理評事攝監
察御史裏行佐黔中又以殿中侍御史內供奉佐浙東
凡四居憲賦介二方伯皆有直聲休利邦人宜之十二

年所從既罷繼之者再至率以重禮禮君終不能屈非
所樂而不苟合故也朝廷宗公賢大夫多悅其風十六
年徵拜祠部員外郎居二年執事者上言其才請爲劇
曹會東方守臣表二千石之缺天子方加恩元元循責
吏理面命執事曰誠如是姑使爲郡須其報政縻加好
爵遂拜歙州刺史在途發瘍夏四月景子卒於洛師享
年五十五夫人河東柳氏殿中侍御史并之息女才淑
有賢行長子某年在羈貫嗣子某未離襁抱夫人旣得
吉卜且以孤藐之詞請表墓于父友故鄙夫泣書于寢
門之外而不讓云君峻而通直而不黨至若流俗之齷

齷細人之姑息屑屑汲汲之態不萌于胷中器度夷遠
英華發外居常無怵迫臨事有風節同心定交造次以
之評議鑒裁清明不惑聳善親仁發于肺肝文章宏朗
有作者風格學不爲人與古爲徒嚮使登其年充其量
束帶公朝其骨鯁魁壘之士歎常與故虔州刺史隴西
李公受故右補闕安定梁寬中今禮部郎中京兆韋德
符右補闕廣平劉茂宏秘書郎趙郡李叔翰方外士右
諭德博陵崔公頴暨子女善熾夫相視莫逆行二十年
洪範之攸好德儒行之遠莫致今則已矣可勝慟耶時
貞元十八年歲直鶉首秋七月甲子鏤堅石而銘曰

皦皦陸生中和粹清直如朱絃潔如白珩或默或語不將不迎如何斯人奄忽冥冥虫虫下輩戢穀或丁瞍瞍芳蘭嚴霜夙零命不可問死不可作嗚呼陸生

唐故尚書司門員外郎仲君墓誌銘

并敘

君諱子陵字某其先魯獻公仲子曰山甫入輔于周食采于樊其後魯有季路衛有叔圉用儒行政事代爲家法會祖習始自彭城徙于蜀郡祖龔博究六藝州閭推重考遠清靜寡欲理老嚴之言三代曠僚純白不耀君卅歲好古學與同門生肄業于峨嵋山下採摭前載可以爲文章樞要者紬繹區別凡數十萬言大曆十三年

舉進士甲科調補秘書省校書郎歷同官醴泉二縣尉貞元十年舉賢良方正拜太常博士轉主客司門二員外郎十八年乙巳寢疾歿于靖恭里第享年五十九修身愍固爲學精力其初典校有詔百執事詳定冕服炳然上奏得禮之中再仕旬內皆參奉常論誤之務后蒼二戴曲臺石渠之論乖疑難正者咸折中焉有司請正太祖東嚮之位而祧獻懿二主議者云云君議畧曰九聖在天二祖在祧國家卜代及年未始有極宜立定制爲萬代程請遷二主于德明興聖廟詞甚切正後以異論紛紛又著通難一篇引今據古諸儒不能屈難留中


未下而知禮者直之爲郎三歲受詔典黔中選補賦祿
清平南人悅焉皇皇者華道於故里里中人以爲榮觀
復命踰年稍進郎位循性詣理恬於聲榮隕然放懷以
馮唐顏駟自况修詞甚博推本六經賦詩類事往往有
卓異不羈之韻遂於禮服止下古今儀制著五服圖十
卷自爲一家之言起庸蜀諸生以文義自達至禮官元
士三登於朝講義洽聞不疚不殆與夫憑覆露乘地資
而至大僚豐祿者難易殊矣子雲者老相如多病內外
掃之日圖書樽酒而已升東榮而復者假他人之室可
悲也夫其族嗣郢王之藻女宗室公宮稱其賢淑生一

子無頗幼學而孤卜七月甲申窆于萬年縣之某原其
理命也德輿常忝知君用深怛化遺孤哀請因直其詞
銘曰

噫仲君直而文心秉彛學軼羣富宏議暢嘉聞中止水
外浮雲理冥冥化法泐刻圓石識幽墳

權載之文集卷第二十五

三



權載之文集卷第二十五

唐權德輿字載之

墓誌銘

唐故朝議郎行尚書倉部員外郎集賢院待制
權府君墓誌銘 并序

公諱自挹字某天水人其先殷王武丁之友因封命氏
楚遷於郟處秦徙于汧隴縣代多才繼有勲力四代祖
襲慶周開府儀同三司相定冀青殷五州諸軍事冀州
刺史齊郡公會祖武隋開府儀同三司浙豫桂三州刺
史潭府惣管始平郡太守右武衛屯衛二大將軍天水

縣開國伯考無悔皇朝請大夫晉州趙城縣令公年十四太學明經上第因喟然曰學不足以究古今之變而千祿者非吾志也遂養蒙于終南紫閣之下窮覽載籍號爲醇儒非其道不合非其人不自歷南和寶鼎二縣尉天寶中河湟之間踐更以禦寇平糴以饋軍皆以御史董之聯辟從事旣而幽陵兵興二京震蕩搢紳之士多在劫中公艱貞終吉盜不能汚尅復之歲制授醴泉尉尋攝監察御史充河西隴右宣慰使崔中丞伯陽判官輶車所履人誦其惠歲中崔復命遷左馮翊表爲祠曹且佐州師朝廷以公文而無害特拜監察御史謙以

自牧受大理寺丞學該今古加集賢院待制職通理典遷尚書倉部員外郎大厯五年春感風疾請告十有二月終于布政里私第享年七十惟公得大易之含章中庸之居易知前古之善敗稽六學之義類靈龜恬然天爵自貴夫如是則通籍書殿起草中臺於諸生不爲不達而充公之量則未也與故主右丞維今歸尚書崇敬爲文雅道素之友其餘或不踐其域故知我者希夫人太原王氏監察御史造之孫也鄆縣令侑之女淑行明德輔于公志叢是福履近于期頤公之喪旣除二十三年而夫人歿壽九十三時貞元十年十有二月也嗣子

某官皆以舊德蕃社叅居吏員盡厥誠信貞于龜筮以
十二年二月耐葬于咸陽縣洪瀆原禮也以德輿諸孫
之列習于舊史郊子之學誠慙古人滕公之室敢識幽
壤銘曰
周隋之間受封于齊代有武功抑抑倉部德音不同藹
然儒風考正圖書彌綸憲章其道昭融黃裳之吉大雅
方直位則未充惟此令德與彼內則委龢而終咸陽占
原耐窆雙魂淑聲無窮

唐故金紫光祿大夫司農卿邵州長史李公墓

誌銘 并序

公諱銘字某不書州里尊宗室也初景王之友啟封于
蔡繼別爲宗厥後多材皇襲濟北郡公乎公之曾祖也
隴西郡公津容公之王父也濟北仕至國子司業贈太
僕卿隴西仕至慈衛汝邢青五州刺史終永王傅以至
列考懋懋監察御史殿中侍御史尙書倉部員外郎累
贈職方郎中虢州刺史公卽虢州府君之第若于子也
憑是積厚蔡生福祉少以門子天官聯調兩宮環列之
佐次補伊闕丞是歲天寶十四載也虢州捐館幽陵兵
起茹毒遼難南浮江淮旣除喪宣州觀察使鄭昞之表
爲廣德令時劉展阻命東方愁擾間里制于萑蒲守臣

化爲寓公而公之縣鄙連亘山洞盜有陳莊陳五奢者
是焉囊橐攻剽相因吳之跳在尋陽牒書密至署爲上
介俾輯輿師靖綏攘遏人用寧紓後歷揚州太原二紀
綱掾府之損益皆所關決執法殿中侍戎北門會罷使
至京師獻狀居最拜奉天令有命成城績用居多未踰
年遷侍御史充宣武軍節度行軍司馬時師帥以睢陽
反譙進律開府韓厥之任朝選爲難蓋以彌縫左右非
公莫可最凡三爲尙書郎四兼御史中丞以銀印青綬
歷官相常伯之重府遷大梁職尊統師公皆以司武從
之蓄資力以崇威望宣忠勞以宏班制居則持重戰則

有功無細無大繫公謀是賴雖羊舌職之聰明肅給鐸
遏寇之恭敬信強無以過也貞元二年真拜左庶子三
年復以本官兼御史中丞充入蕃使尋兼御史大夫行
次回中察其陰詐密疏累陳不可莅盟之狀時朝議已
行謀塞不用旣而戎人衷甲急變上聞乘車東轅獨以
智免以久次遷衛尉卿秩以金紫乃命大農爲國之泉
首公修職惟直是視無所阿附終用蔽傷左遷邠州長
史以十三年十一月日寢疾終于所莅之官舍春秋若
干惟公開敏毅直信廉仁勇有政事方畧長于理煩遠
而不泥文而無害始以通邑行師振其名聲交辟元僚

翻飛清朝腰金鳴玉法象河海議者謂蕃垣京轂公宜居之終以當官有守寧拙不苟不為利疚於回鬱堙下國以至大病始可嘆已夫人范陽郡夫人盧氏某官某之孫新安丞某之女華宗淑問光輔閨門無詭離無攸遂內姻外姻仰其徽風先於公二年而歿長子元亮以武略至御史中丞不幸早亡次子元道以吏才為大理司直兼監察御史參陳許軍事次曰元規進士第蓋屋縣尉次曰元會前右金吾衛兵曹參軍元簡江陵府參軍元舉太元府參軍元弼元術元輔等皆裕蠶知方儼然在疚考于象數先遠得吉以十四年某月日奉公夫

人之喪祔窆於伊闕縣萬安山南原先公之兆域禮也德輿王父王族之出也先人于公為中表昆弟羈貫獲見殆四十年元道等泣以墓石見託雖文之鄙朴而不敢辭也銘曰抑抑司農系于蔡兮三珪再踐直方大兮心廣體胖道將泰兮中立不回官左退兮發書問鵬禍所會兮與日焯龜紛祖載兮萬安鮮原風雨晦兮鏤此貞珉璣之內兮

唐故朝散大夫守司農少卿賜紫金魚袋隴西縣開國男李公墓誌銘 并序

公諱條字堅後以字爲諱淮安靖王贈司空神通之元孫也鹽州刺史孝銳司空之昭也宏農太守璟鹽州之穆也太子太傅贈司徒齊物公之禰也尚書左僕射贈司空復公之兄也代以忠厚而膺爵命勲籍吏部皆冠宗室公稟是慶祉生而朗邁宏毅疏達方廉孝悌學以遜志文而無害始以門廕參調三命官至廷尉評明清閎實適其輕重改宣城令滿歲受代縣人以理狀乞留廉車上聞詔可其奏且加大理司直從人欲也縣鄙之南水泉委滙每暑雨流淹輒傷大田公乃峻爲之防悅使其衆人就安利稼皆登成大厯中鄜坊節度使表爲

上介遷監察御史殿中侍御史中權策畫一以吝之成師足食邊備益固使罷除昭陵臺令貴強沓貪奸冒法禁公職在充奉露章以聞以爲巧言所中坐貶建安尉在途累疏詞理剴切上覽而直之罪人就誅方議牽復屬太夫人棄敬養貞元初移蘄州長史尋徵還京師執事者銳於引重公亦啟心獻熟會一人有漢宣共理之嘆拜泉州刺史泉人宜之入爲宗正丞時卿長與其貳不相能告訐之書紛然交訴詔公平之皆得其中自後屬籍疑讞顯其聽斷兩造以明九族以和九年授果州刺史先是里下無解署官司無令書節用量功經構講

聚百堵乃興九章粲然政用樂易人皆輯附居部明年有女道士謝氏白晝上昇優詔嘉異州閩咏嘆十一年以課最陟爲司農少卿國泉邦用精力區處利病陳聞靡不纖悉十四年宸心憫雨比屋艱食出其陳陳以活元元又百吏之祿廩以粟易幣則輕重相準而便於人皆自公發之也公稽覽故志通練程品嘗獻軍國便宜五章推理道以及人事其他奏議皆附經術有蹇蹇匪躬之操焉渥澤日加方厚其屬任而才命相整末如之何十五年三月乙巳以疾終于勝業里私第享年五十九夫人滎陽鄭氏某官某之女姿操柔明先于公若干

年而歿乃者以公之勤追封滎陽縣君其孤曰昌舉進士甲科淑行至性公族稱其有後以其年五月甲寅龜筮襲吉血涕奉喪祔塋于萬年縣某原先公之兆域以德輿獲詳踐履俾篆斯文其銘曰

昔在靖王愨策司空至公父兄亦命三公公族家代車服以庸允矣司農直方懿恭行惟遜悌仕乃廉忠利及刺鐘輕翰遡風時方大來命則不融柳車遲遲棘人充充如履夏屋歸全舊封圓石琢銘永識于中

唐故鄜坊節度推官大理評事唐君墓誌銘并

序

君諱欵字嘉言北海人曾祖貞休皇比部郎中河南少
尹祖詡太子洗馬考試河南府士曹參軍代有懿行遠
承華構君清方敏厚幼有立志與伯氏文編講議修詞
知名於士友間其文筆浹洽而長於比興其義行潔修
而篤於友悌貞元初舉進士甲科解巾補宮衛紀綱掾
右輔守臣撫封粹士表為支使轉左領軍倉曹明年復
調為左金吾領曹因喟然曰吾三命不越於環列其道
蹇歟滿歲晏居吟咏情性而已會故人彭城劉景通受
天子推轂之重鎮于洛郡碎書既至命書繼下以廷尉
評理軍訟未幾請急省兄于盛山又東南至于雲安間

關巴峽嬰冒霧露俄而景通入覲為冬官司空方欲盛
薦君於獻納侍從之列景通既列左右曹中執法多所
引重而枕疾不起悲夫時二十年秋八月壬子其年四
十有九昔崔駟管輅官不過長岑令少府丞而當時之
翕然扇巧言進取滿志者可勝道哉天閼紛綸從古所
歎初娶馮翊嚴氏興元長帥相國太保公之女不幸早
亡繼娶天水權氏華州司士參軍集之女子之從姐妹
也有明識淑行為六姻儀法結縭周月遭罹栢舟之痛
遭崩方娠可哀也哉子與文編周旋於文章道義二十
年矣故辱君之歡亦舊淮湖睽阻京轂會合合姓怛化

在句歲之中寢門屑涕情何有極冬十月庚寅其孤揮
既得卜吉窆于萬年縣義善原且虞正夷谷變不可以
不識遂爲銘曰

一氣运运浮休滑潛英華未申奄忽歸根于嗟乎嘉言
于嗟乎九原刻此清芬

唐故太原府史事軍李府君墓誌銘

并序

君諱雍字某趙郡鄙人曾祖萬安皇鄒平郡丞祖頊贈
鄭州刺史父日知皇銀青光祿大夫黃門侍郎侍中戶
工刑三尚書君承廕休覆露而資性和厚有詞藻工篆
隸起家太子通事舍人轉太常寺主簿年甫成童卓然

有立志歷都水監丞長安丞轂下難理號爲稱職下太
夫人韋氏憂免喪猶毀不交人事尋詔除太原府錄事
參軍已抱沉痾以開元十九年夏五月没于長安昇道
里享年四十五噫嘻以侍中公之寬明正直忠孝于君
親書在國籍爲景雲賢相宜其子姓昌阜有韋平之慶
而義方積善所及不過于丞吏都吏未強仕而天斯命
矣夫人范陽盧氏殿中侍御史敷之女司勳郎游之妹
華宗淑行先没者二歲有子元之仕至晉州洪洞縣令

愷悌之化行於鄉黨命屈其才亦不至大官洪洞之子
曰鄧州新野令彬萬年尉彤陳州太康主簿彩太公廟

丞彬前明經或等以吏以文循守家法君初嘗謂洪洞
 曰吾家代壤樹在周鄭之郊延陵瀛博豈限故土苟吾
 啟手足必促擇不食之地而歸全焉故君沒之歲秋八
 月權窆于萬年縣龍首原厥後七十有七歲彬彤等居
 內憂忍哀襄事因竭誠信循祖禰之志啟君之窆遷祔
 于京兆府奉先縣漫泉鄉章保里從吉卜也與洪洞君
 庚甲分穴昭穆列次聿修之義情理無違而彤又狀其
 祖德請刻墓石抑予之重表甥也嘉其忠孝而銘之其
 詞曰

伊昔侍中實相睿宗以孝以忠穆然清風乃生長土博

約仁義坦坦居易鬱埋下位家有孝孫卜茲鮮原刻勒
 清芬藏于墓門

唐故監察御史清河張府君墓誌銘 并序

君諱衆甫字子初清河人曾祖尚皇海州司馬祖宏藝
 皇兗州曲阜縣令考隱皇淄州司戶參軍君早為諸生
 能以學行自力寬廉而溫朴厚而文居易向晦固窮不
 變故年過耳順而方脫章甫冠惠文示不苟也初為轉
 運使所辟解巾太常寺太祝轉河南府壽安縣尉罷秩
 歷年僑居雲陽時以緣情比興疏導心術志之所之輒
 詣絕境間以羈旅遊京師卿大夫聆其風者方以聲韻

屬和不暇會淮寧軍帥之始至也。春東僚佐求士於朝，朝賢多以君爲才，辟書薦至。俄拜監察御史，且爲從事。讜言幕畫舉無違者，徵軍實於廣陵，因涉江省家道病。沉痾不克復命，以建中三年三月日至家而終。享年六十八。夫人汝南周氏，先於君歿，其孤曰實，曰宇，年並孩。亂未勝，纒經遂以其月日權柩焉。嗚呼！貴仕眉壽，或與令德不并。此昔賢所以爲歎。姑以景行茂實，賁于重泉。銘曰：

洪範之義，享用五福。展如之人，宜荷百祿。嘉言婉婉，則罔攸復。旣鐵其冠，亦朱其服。浮休沄沄，歸全返真。喬木荒墳于嗟乎張君。

唐故揚州兵曹參軍蕭府君墓誌銘 并序

君諱惟明，字某，南蘭陵人。曾祖凌，皇丹州刺史。祖文遠，皇睦州別駕。考重暉，皇金州別駕。自丹州以降，雖位不過守佐，而皆以行義似續。君卽別駕府君之元子也。天寶中舉秀才，數上行，過乎謙，竟不得居甲乙科。時苟未至，雖巧力無所措，其用否不可外。後累爲知已，薦自明州參軍事。至揚州，兵曹掾凡更四官，皆有理效。多以名聞薦拜，或參從事之列。向非又有餘而用無滯疇，能及此晚歲病風家于丹陽，葆真樂和樽酒，自適輕財重義。

推誠于朋友之間不飾邊幅以曠達自任初君與令弟
故司封郎中惟則同以儒服游京師賢士大夫締交慕
義者如響郎中以通才歷職而君亦累爲名公所薦年
位未至相次凋落嗚呼以建中二年四月日所疾沉痼
終于丹陽私第享年若干以某月日權窆于其所從宜
也夫人扶風竇氏婦道柔明三子風潮汶等年未志學
藐然無怙芻挽將行哀以求銘誌曰

南齊之後福祉薦臻厥生兵曹洵美且仁如何中路翳
魄荆榛刻石窮泉永志聲塵

唐故潤州丹陽縣丞盧君墓誌銘

并序

君諱峴字某范陽人自魏已降官婚人物爲天下清甲
大畧書于國史詳言在乎家牒今所書三葉自曾王父
衛州司馬府君諱宏壽初貞晦不仕公車徵拜至冀州
信都主簿府君諱友裕友裕生揚州高郵縣令府君諱
相君卽高郵之第若干子奉前人之業講先師之訓以
之克家以之從政直方謙厚卑不可踰筮仕三次不離
州縣之職曰亳州蒙城主簿楚州寶應縣尉潤州丹陽
縣丞寬敬莅事不希名譽故每當廉問薦延之日使臣
陟明之舉皆遷延晦避時議多之清行懿名竟用不振
以大厯九年七月日寢疾終于官舍享年五十五其娶

隴西李氏柔順有婦行嗣子某等訣于著蔡銜恤襄事
 以關河不靖未克歸附遂以某月日權厝于縣之北面
 焉從宜也予僑居丹陽常與君游故粗書事實以備刻
 石銘曰

生死沅沅如環斯循于嗟盧君於此歸根

此碑在丹陽縣北關河之北
 李氏柔順有婦行嗣子某等訣于著蔡銜恤襄事
 以關河不靖未克歸附遂以某月日權厝于縣之北面
 焉從宜也予僑居丹陽常與君游故粗書事實以備刻
 石銘曰
 生死沅沅如環斯循于嗟盧君於此歸根

